

Nzambi wa Ditalala

“Nzambi wa ditalala wakabisha mulami munene wa mikoko munkatshi mua bafue kabidi ku mashi a dipungila dia tshiendelele, Mukelenge wetu Yesu mene, anuvuije bakane tshishiki mu bualu buimpe buonso bua kuenza bu mu disua diandi, wenza munda muetu bualu budi buimpe ku mesu kuandi bua Yesu Kilisto; butumbi buikale kudiye ku bikondo ne ku bikondo. Amen.” (Ebelu 13:20,21)

Kilisto Yesu udi ditalala dietu

Mukelenge Yesu, Mulami Munene wa mikoko, wakavuija “ditalala ku mashi a ku mutshi mutshiamakane.” (Kolosai 1:20) Mukelenge wakafuta dibanza dietu pakadifileye bua mibi yetu.

Mukenji wa Lumu Luimpe ludi ne, “Biwajukula ne mukana muebe ne, Yesu udi Mukelenge, ne biwitabuja mu mutshima webe ne, Nzambi wakamubisha ku bafue, neusungidibue. Mukanda wa Nzambi udi wamba ne, Wamuitabuja kena ufuishibua bundu.” (Lomo 10:9,11)

“Nunku umushayi bukoya buonso ne divulangana dia malu mabi, nuitabuje diyi ne kalolo didi dikunyibua munda muenu, didi dimanye mua kusungila mioyo yenu. Kadi nuikale benji ba diyi, kanuikadi anu bunvui badi, bua nunku nudi nudidinga.” (Yakobo 1:21,22)

Paulo wakafundila Bena Filipoi ne, “Malu aa kabidi anuakayila ne anuakangata ne anuakumvua ne anuakatangila kundi, nuikale nuenze malu aa; ne Nzambi wa ditalala neikale nenu.” (Filipoi 4:9)

Ditalala



Ditalala ne Nzambi

Tshikadilu tshia bantu kabayi ne Nzambi

“Kakuena muntu udi muakane, nansha umue ... bonso bakenza malu mabi, ne badi bapanga kupeta butumbi kudi Nzambi.”

(Lomo 3:10,23)

Paulo wakafundila Bena Efeso ne, “Nuvuluke ne, Ku tshikondo atshi nuakadi kanuyi ne Kilisto ... kanuyi ne ditekemena, kanuyi ne Nzambi mu buloba ebu. Kadi katataka mu Kilisto Yesu nuenu bakadi kule diambedi nuakavuijibua pabuipi mu mashi a Kilisto. Bualu bua yeye udi ditalala dietu.”

(Efeso 2:12-14)

Mukelenge Yesu wakalua “bua kutukoshela badi bashikame mu midima ne mu dileshe dia lufu, ne bua kuendesha makasa etu mu njila wa ditalala.”

(Luka 1:79)

Mukelenge Yesu wakavuija “ditalala ku mashi a ku mutshi wandi mutshiamakane.”

(Kolosai 1:20)

“Bualu bua patutshivua batekete, mu tshikondo tshiakane Kilisto wakafuila bantu babi. Budi bualu bukole bua muntu kufuila anu muntu mubingishibue, kadi bumue mukuabo neitabuje kufuila muntu muimpe wa bushuwa. Kadi Nzambi wakatamba kuleja luse luandi kutudi mu muanda ewu ne, Patutshivua bantu babi, Kilisto wakatufuila.”

(Lomo 5:6-8)

Mukelenge Davidi wakamba bua “disanka dia muntu kudi Nzambi ubala buakane budi kabuyi bua mudimu, ne, Bobo badi basankishibua badi ne bupidia buabo bulekedibue, mbadi ne malu mabi abo mabuikidibue. Muntu udi usankishibua ngudi Mukelenge kayi ubala bubi buandi.”

(Lomo 4:6-8. Musambu 32:1,2)

“Nunku bualu bua tuakabingishibua ku ditabuja, tuikale ne ditalala ne Nzambi bua Mukelenge wetu Yesu Kilisto.”

(Lomo 5:1)

Ditalala dia Nzambi

“Mukelenge udi bapuipi. Lekelayi kuditatshisha ku bualu bumue; kadi mu malu onso ku ditendelela ne ku disengelela numanyishe Nzambi bua milombu yenu ne disakidila. Ne ditalala dia Nzambi didi ditamba dijingulula dionso dia bantu, nedilame mitshima yenu ne meji enu mu Kilisto Yesu.”

(Filipoi 4:5-7)

Mukelenge Yesu wakamba ne, “Luayi kundi, bonso badi ne mudimu mukole, badi ne bujitu bunene, meme nenupe dikisha. Angatayi mutshi wanyi wa tshikokedi pa nshinga yenu, nuyile malu kundi; bualu bua meme ndi ne kalolo ne kanemu mu mutshima wanyi; nunku nenusangane dikisha mu mitshima yenu. Bualu bua mutshi wanyi wa tshikokedi udi muakane ne bujitu buanyi budi bupepele.”

(Matayo 11:28-30)

Ditalala dilelela

Yesu wakamba ne, “Ndi nushila ditalala, ndi nupa ditalala dianyi; tshiena nupadi bu mudi ba pa buloba banupadi. Mitshima yenu kayizakadi, kayitshinyi.”

(Yone 14:27)

“Nutendelele Nzambi misangu yonso ne kulomba kuonso ne disengelela dionso mu Nyuma Muimpe; nuikale batabale mu dinanukila dionso ne disengelela bua basanto bonso.”

(Efeso 6:18)

“Nyuma Muimpe kabidi udi ukuatshishangana netu mu butekete buetu; bua katuena bamanye mua kulomba Nzambi bu mutudi nabu mbua kumulomba, kadi Nyuma muine udi utuakuila ne mikemu idi kayi mua kuambibua. Nzambi, udi ukeba mu mitshima ya bantu, udi mumanye meji a Nyuma ne, Udi wakuila basanto bu mudi Nzambi musue. Tudi bamanye kabidi ne, Malu onso adi akuatshishangana bua kuvuija diakalengele kudi bantu badi bananga Nzambi, kudi badi babikidibue bu mudi disungula diende.”

(Lomo 8:26-28)